

Finance Committee

Y Pwyllgor Cyllid



Bae Caerdydd/Cardiff Bay
Caerdydd/Cardiff
CF99 1NA

Gorffennaf 2014

Galwad am wybodaeth – Cynigion cyllideb ddrafft Llywodraeth Cymru ar gyfer 2015–16

Mae pwyllgorau Cynulliad Cenedlaethol Cymru yn galw am wybodaeth i gynorthwyo gyda'r gwaith o graffu ar Gynigion Cyllideb Ddrafft Llywodraeth Cymru ar gyfer 2015–16. Mae gennym ddiddordeb mewn ymchwilio i'r disgwyliadau o ran cyllideb 2015–16, gan gynnwys parodrwydd ariannol ar gyfer blwyddyn 2015–16 ac effaith cyllideb 2014–15.

Nid ydym yn gwybod ar hyn o bryd beth fydd cynigion y gyllideb ddrafft, gan na fyddant yn cael eu cyhoeddi tan fis Medi/Hydref 2014. Fodd bynnag, cyhoeddwyd dyraniadau dangosol ar gyfer blwyddyn ariannol 2015–16 yn y Gyllideb Derfynol 2014–15.

Mae'r Pwyllgor Cyllid yn edrych ar gyllideb Llywodraeth Cymru o safbwynt strategol a chyffredinol. Rydym hefyd yn cydweithio â phwyllgorau eraill y Cynulliad i sicrhau y caiff cynigion ar gyfer portffolios Gweinidogol penodol eu hystyried yn fanwl. Bydd y pwyllgorau yn cynnal sesiynau i ganolbwyntio ar dystiolaeth gan y Gweinidogion perthnasol er mwyn edrych yn fanwl ar yr agweddau ar y gyllideb sydd o fewn eu cylchoedd gwaith hwy, ac wedyn yn cyflwyno adroddiad i'r Pwyllgor Cyllid, gan amlinellu unrhyw bryderon sydd ganddynt.

Nodir pedwar cwestiwn penodol gennym yn y papur hwn. Gallwch ateb unrhyw un neu bob un o'r cwestiynau, neu gallwch roi gwybod i ni am eich pryderon a'ch disgwyliadau o ran y gyllideb ddrafft yn gyffredinol.

Cwestiynau'r ymgynghoriad

1. Beth, yn eich barn chi, fu effaith cyllideb 2014–15 Llywodraeth Cymru?
2. Gan edrych ar y dyraniadau cyllideb dangosol ar gyfer 2015–16, a oes gennych unrhyw bryderon o safbwynt strategol a chyffredinol, neu ynglŷn ag unrhyw feysydd penodol?
3. Pa ddisgwyliadau sydd gennych o gynigion cyllideb ddrafft 2015–16? Pa mor barod yn ariannol yw'ch sefydliad ar gyfer blwyddyn ariannol 2015–16, a pha mor gadarn yw'ch gallu i gynllunio ar gyfer y blynyddoedd sydd i ddod?
4. Hoffai'r Pwyllgor ganolbwyntio ar nifer o feysydd penodol wrth graffu ar y gyllideb. A oes gennych unrhyw sylwadau penodol o ran y meysydd a nodir isod?
 - Paratoi ar gyfer Bil Cymru
 - Trefniadau ariannol y byrddau iechyd lleol
 - Dull gweithredu o ran gwariant ataliol, a sut y cynrychiolir hwn wrth ddyrannu adnoddau (Gwariant ataliol = gwariant sy'n canolbwyntio ar atal problemau a lleddfu'r galw am wasanaethau yn y dyfodol, drwy ymyrryd yn gynnar).
 - Effaith rhaglen ddeddfwriaethol Llywodraeth Cymru, ac a oes digon o adnoddau ar gyfer ei rhoi ar waith.
 - Craffu ar y Gymraeg, cydraddoldeb a chynaliadwyedd.

Datgelu gwybodaeth

Mae polisi'r Cynulliad ynghylch datgelu gwybodaeth i'w weld [yma](#). Gofalwch eich bod yn ystyried y manylion hyn yn ofalus cyn cyflwyno gwybodaeth i'r Pwyllgor. Neu, mae copi caled o'r polisi hwn i'w gael drwy gysylltu â'r Clerc (02920 898120).

Mae rhagor o wybodaeth am y Pwyllgor Cyllid ar gael [yma](#).

Darparu gwybodaeth i'r Pwyllgor

Gwahoddir pawb sydd â diddordeb i gyflwyno tystiolaeth ysgrifenedig i Glerc y Pwyllgor Cyllid, erbyn dydd Mercher, 10 Medi 2014. Os hoffech gyfrannu ond eich bod yn pryderu na fyddwch yn gallu cyflwyno eich tystiolaeth erbyn y dyddiad cau, cysylltwch â Chlerc y Pwyllgor ar 029 2089 8120.

Yn gywir

A handwritten signature in black ink that reads "Jocelyn Davies". The signature is written in a cursive, flowing style.

Jocelyn Davies
Cadeirydd y Pwyllgor Cyllid

Atodiad 1 – Gwybodaeth gefndir

Pwy ydym ni?

Pwyllgor trawsbleidiol o Gynulliad Cenedlaethol Cymru yw'r Pwyllgor Cyllid, ac mae'n cynnwys Aelodau o bob un o'r pedair plaid wleidyddol a gynrychiolir yn y Cynulliad.

Nid yw'r Pwyllgor yn rhan o Lywodraeth Cymru. Yn hytrach, mae'r Pwyllgor yn gyfrifol am adrodd ar gynigion a roddwyd gerbron y Cynulliad gan Weinidogion Cymru sy'n ymwneud â defnyddio adnoddau.

Pwy yw'r Pwyllgorau eraill sy'n craffu ar y gyllideb?

Y Pwyllgorau eraill sy'n craffu ar y gyllideb yw:

- [Y Pwyllgor Plant, Pobl Ifanc ac Addysg/CommitteeDetails.aspx?ID=224](#)
- [Y Pwyllgor Cymunedau, Cydraddoldeb a Llywodraeth Leol](#)
- [Y Pwyllgor Menter a Busnes](#)
- [Y Pwyllgor Amgylchedd a Chynaliadwyedd](#)
- [Y Pwyllgor Iechyd a Gofal Cymdeithasol](#)

Beth yw cyllideb ddrafft Llywodraeth Cymru?

Rhaid i gynigion y gyllideb ddrafft gynnwys manylion ynghylch faint o adnoddau y mae Llywodraeth Cymru yn cynnig eu defnyddio yn ystod y flwyddyn ariannol ddilynol a ffigurau dangosol ar gyfer y ddwy flwyddyn ariannol ar ôl hynny. Yn fwy penodol, dylai amlinellu gwybodaeth ynghylch:

- Yr adnoddau sy'n cael eu defnyddio gan Lywodraeth Cymru, Comisiwn y Cynulliad, yr Archwilydd Cyffredinol a'r Ombwdsmon Gwasanaethau Cyhoeddus.
- Incwm sydd i gael ei gadw gan y sefydliadau hynny (yn hytrach na chael ei ildio i Gronfa Gyfunol Cymru).
- Yr arian parod sydd i'w dynnu o Gronfa Gyfunol Cymru gan y sefydliadau hynny.

Dros y blynyddoedd diwethaf, mae Llywodraeth Cymru hefyd wedi darparu dogfen naratif sy'n rhoi eglurhad pellach o'r dyraniadau manwl i adrannau'r Llywodraeth, yn ogystal â chronfeydd wrth gefn a dyraniadau cyffredinol eraill.

Pam nad ydym yn cynnal yr ymgynghoriad hwn ar ôl i gynigion cyllideb ddrafft Llywodraeth Cymru gael eu cyhoeddi?

Ni fydd ymateb i'r ymgynghoriad hwn yn eithrio rhanddeiliaid rhag hefyd ddarparu gwybodaeth, tystiolaeth, pryderon ac awgrymiadau ynghylch meysydd craffu posibl i bwyllgorau Cynulliad Cenedlaethol Cymru **ar ôl** i'r cynigion ynghylch cyllideb ddrafft Llywodraeth Cymru gael eu cyhoeddi (30 Medi 2014).

Fodd bynnag, fel arfer bydd pwyllgorau yn dechrau craffu ar waith Gweinidogion y Llywodraeth ynghylch cynnwys y gyllideb ddrafft wythnos neu bythefnos ar ôl iddi gael ei chyhoeddi, gyda'r bwriad o gyflwyno eu casgliadau i'r Pwyllgor Cyllid ddiwedd mis Hydref. Mae'n ofynnol i'r Pwyllgor Cyllid gyflwyno ei adroddiad ei hun ar y gyllideb ddrafft erbyn 11 Tachwedd 2014.

Golyga hyn fod yr amser sydd ar gael i randdeiliaid leisio eu pryderon i'r pwyllgorau yn brin fel arfer (wythnos neu ddwy). Wrth ymgynghori yn awr, gobeithiwn y bydd gan randdeiliaid fwy o amser i ystyried effaith bosibl y gyllideb.

Beth yw'r dyraniadau dangosol ar gyfer 2015–16?

Gellir llwytho Cyllideb Derfynol Llywodraeth Cymru 2014–15, gan gynnwys dyraniadau dangosol ar gyfer 2015–16, a'r dogfennau esboniadol oddi ar y we yma:

<http://cymru.gov.uk/funding/budget/final-budget-2014-2015/?lang=cym>

Gellir gweld adroddiad cynnydd diweddaraf Llywodraeth Cymru ar y Rhaglen Lywodraethu yma:

<http://cymru.gov.uk/about/programmeforgov/;jsessionid=4CC7D392402B1B3C211BDB2EF6C9F19A?skip=1&lang=cym>